



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

Canada-i kiralongrartem  
jenokdaksür: EAM Jaishankar

Asian Games Day 6: India nungeri gold  
ana densema medal ti angur



VOL. XX NO. 349 (ADOK 349)

DIMAPUR KÜPTOKNÜ (SATURDAY)

RONGJUI (SEPTEMBER) 30, 2023

₹ 5.00

## Ahmedabad nung Naga tsür ka dak teka sangshir puogo



Mohsin Rangrez

anema ken o benoker den ajurutepe aodang Gujarat police-i apu.

Ahmedabad nung tebur kati Northeast tsür ka züka merenshiba video ka social media nung kanga prokshia liasü.

Arishi küm 24 tain tetsür la ya Nagaland nungi lir aser Mohsin Rangrez-i dak azükba aser kou nung atsüba video nung angur.

Iba ya September 25 nü atalok aser spa kima nung aliba CCTV camera nung tatalokba ajunga menüngoka liasü. Iba atema FIR ka benokba sülen September 27 nungi police-i bushisüngdang ka tenzükba liasü.

Iba lendong atalokba sülen tetsür laibo anogo ana tashi FIR agütsüsü memulungi liasü. Ajisüka police-i social worker ka teyari ajanga tetsür la den tongtepa counselling asüba sülen FIR benok.

**Ahmedabad, September 29, 2023 (Agencies):** Gujarat kübok Ahmedabad nung Nagaland nung tetsür ka züka merenshiba nisung Mohsin Rangrez puogo.

Mohsin Rangrez ya Ahmedabad nung spa ka kibur lir aser pai pa den külemi yariteper tetsür la züka merenshi. Pa September 28 nü apu.

Mohsin ya Danilinda nung alir aser pai gurudwara ka nung pa

## Dimapur dokan nung sen lakh 3 auya

**Dimapur, September 29, 2023(TYO):** Hokolbarnep yakta Dimapur kübok Purana bazaar nung mejangjaba nisung kati two-wheeler showroom ka nungi Rs. 3 lakhs auya bener ao.

Hokolbarnep iba showroom nung inyakertemi dokan lapokdang auyaba ya puteta liasü.

Auer jagi dokan tejaklen nungi telungi ai aser glass cash counter raksar sen agiteta bener ao. CCTV footage nung nisung ka dokan telungi aitba lir saka pa indang maitsü mejangjateter.

Iba tatalokba atema police-i two-wheeler showroom semdangogo aser bushisüngdang ka tenzükogo.

## Nagaland Police-i drugs anema kanga meranga rarar

**Dimapur, September 29, 2023 (TYO):** Nagaland nung drugs shibelenba azüoktsü atema Nagaland Police-i tesüiba ita 3 tashi kanga dang meranga inyaka arur.

Nagaland Police-i drug-free Nagaland atema inyaka arudang mapa aika inyaktetogo. Iba mapang Narcotic Drugs and Psychotropic Substances (NDPS) Act dak sendakba nung nisung 157 apu aser ken o 133 benokogo.

Nagaland Police-i NDPS Act aser Drugs and Cosmetics Act kübok Ganja seret 139.503, Opium seret 28.853, Heroin seret 5.164, Brown Sugar seret 1.145, Yaba Tablets 5,750, Other Synthetic Drugs 20,116 units aser Cough Syrup 2,446 bottles apu.

Nagaland Police-i Rs. 20

Crore tema alangba drugs aser substances apu aser unit balalai pei pei tesem nung mapa inyaka arudar.

Nagaland Police kübok unit balala campaign agiba nung DEF Kiphire unit-i "Operation Good Samaritan" agiba ka lir. Iba campaign ajanga ki ajunga sema senzür aser idangji kibong shia nem 'Nasha Mukth Bharat Abhiyan' indang pamphlets lema agütsür.

Nagaland Police-isa drugs achiba police tem jangjatsü aser parnok nem rehabilitation & detoxification maongkatem agütsür.

Ajisüka Nagaland police-i parnok züngsemtem rehabilitation centers nungi jena aoba mesüra maliba putetra disciplinary action agütsü ta tekümdangtsü osang ka metetdaksüogo.

## EVMs & VVPATs indang workshop ka agi

**Kohima, September 29, 2023 (DIPR):** Parliamentary Election, 2024 atema EVMs & VVPATs First Level Checking indang workshop ka Honibarnü agiogo.

Iba sentong ya Hotel Japfu, Kohima nung Election Commission of India ajanga ayongzükba agi aser District Election Officers aser Dy. District Election Officers (FLC-in-charge / FLC Supervisors) aden.

Sentong nung Chief Electoral Officer Nagaland (officiating) Ruokuovituo Khezhe-i okila

jembi.

Iba workshop nung shisalen sayurtemji ECI nungi Under Secretary Rakesh Kumar aser Section Officer Pawan Bhattar, State Level Master Trainer for EVM-VVPAT Tiameren Chang, NCS aser ACEO & EVM Nodal Officer Roland Merry nungertem liasü.

Maneni, Electronic Corporation of India Limited (ECIL), Hyderabad nungi EVM/VVPAT Engineers ajanga Pre FLC Unit (PFLCU) amshiyim sayu.

## Manipur police-i lungkak aiter dak "minimum force" amshitsü lemtet



Manipur nung dokan kibur kati par dokani central armed forces aser parnok kinungertem marutsü zülur ayuba angur.

**Imphal, September 29, 2023**

**(Agencies):** Manipur nung kaketshirtemi lungkak aitdang security forces-i tashiyim mapa inyakba ken o tem bushisüngdangtsü atema Manipur police-i luden ka tentetogo.

"Tesüiba anogo ishika Imphal temeket nung tensa azüoktsü atema inyangdang security forces-i tashi alia amshiba ken o tem benoka lir" ta Manipur director general of police (DGP) Rajiv Singh-i ashi.

"Item ken o tem jangjatsü atema luden ka tentetogo aser parnoki tekaratiba nung osang agütsüsü" ta paisa ashi.

Züngsem anati akümba luden ya Manipur police IG K Jayanta Singh lenisüba kübok asütsü aser

pa den AAIG Th Sanatomba Singh-i yariteptsü.

Meitei nunger kaketshir ana Kuki telungpurtemi tepset ta temulung melema bilema kaketshirtemi Imphal valley nung yimdong nung lungkak aityonga temeten meshia arur.

Iba mapang Manipur police aser tanga security forces ajanga kaketshirtem dak tashiyim mapa inyak ta tai tongloktür.

Brihostibar nikongdang Manipur police headquarters nung central armed police force (CAPF) ketdangsurtem den senden ka amendang law & order tensa indang jembitepa liasü.

Iba senden nung kaketshirtemi lungkak aitdang "minimum force" amshitsü

lemtet.

"Iba senden nung kaketshirtem aser security personnel yiruba osangtem benoka lemsatep. Public aser talisa kaketshirtem dak minimum force amshitsü jembitepogo" ta Manipur police-i sangdong ka nung ashi.

Manipur police-isa kaketshirtem dang ozüng amertem den amalitep alitsü mepishir ta metetdaksü.

Nisung kari dang tensa raksatsüsa mapa inyakra police-i merenshitsü ta parnokisa shisem.

Manipur nung dokan kibur kati par dokan nung central armed forces aser parnok kinungertem marudaksütsü metetdaksüogo.

Manipur nung security forces-i kaketshirtem dak tashiyim mapa inyakba atema dokan kiburi poster ka yua lir.

Iba poster nung "AR (Assam Rifles), RAF (Rapid Action Force), Assam Regiment, India Army aser parnok kinunger shinga arutsü memelar" ta zülua lir.

Manipur nung police aser security forces ajanga kaketshir 50 jungnüa yirutsüba sülen iba dokan kiburi central armed forces personnel noktangka mapa inyak ta osang angazüker.

## Mapa agütsürtem aser bushirtem yariteptsüla: NPCC



**Kohima, September 29, 2023**

**(TYO):** Nagaland nung mapa agütsürtem aser mapa bushirtem tsüngda amalitep alitsü nüngdaker ta Nagaland Pradesh Congress Committee (NPCC) President S. Supongmeren Jamir-i ashi.

NPCC Public Grievances Department-i state ajungalen sema senzüdang zünger mapa manguba lanur 78,000 tashi Department of Employment nung tenüng züluka aliba metet aser ano tenüng mezülusemer aika lir ta Supongmeren-i ashi.

NPCC teloki tesüiba ita nungi Peren aser Zunheboto dak alaka district ajunga semogo, ta pai ashi.

"Employment Exchange department-i Nagaland Public Service Commission (NPSC) aser Nagaland Staff Selection Board (NSSB) den

sendakteptsüla aser groundwork study shitak agiba sülen zünger mapa mangur nem mapa agütsüsü atema asadangtsü nüngdaker" ta Supongmeren-isa metetdaksü.

Mapa bushirtem aser employment exchange office tsüngda ongdang tulu ka lir. NSSB aser NPSC exams dak alia employment exchange office-i lanurtem asoshi company balala indang advertisements kecha magütsür, ta paisa shisem.

2021-2022 tsüngda ibala osang kecha maliasü. Employment exchange office ajanga sentong tajungtem atonga inyaktsüla ta paisa ashi.

"Lanur aikati NSSB aser NPSC exams nungbo takok angur saka interview nung meshimer. Anungji sorkari lanurtem asoshi lenmang kar bushitsüla kechiyong lanur aika

tezü atangtsü aser parnok loktiliba mesüra sorkari meyaritetsü" ta NPCC president Supongmeren-isa ashi.

"Hangzhou, China nung Asian Games nung shilem magitettba Wushu players asemji Indian Wushu team nungi shilem agirtem ama züngshitsü aser parnok shia nem sports policy nungi Rs 20 lakh agütsüsü ta Arunachal Pradesh Chief Minister Pema Khandu-i Bodbarnü shiogo. State sorkari iba amai ajungmesotsüla aser policy tem yanglushira asenoki tanga state tem den tokteptetsü" ta paisa metetdaksü.

NPCC President Supongmeren-isa 15th (IR) Mahila band ajanga 'India's Got Talent' nung shilem tajung agiba atema tenüngsang agütsü aser Nagaland asoshi konang bentsür arutsü ayongzük.

### Dept. of Soil & Water Conservation ajanga "Soil and Weather" kaket saya



S.K. Hekshe, Director, Soil & Water Conservation ajanga "Soil and Weather" kaket sayatsüdüng tangokba noksa nung angur.

**Dimapur, Rongjui/Sept. 29 (TYO):** Department of Soil & Water Conservation ajanga kaket tasenba "Soil and Weather" sayaba sangdongogo, kong tanü-asüing aluyimba nung ali temu tendangba indang shia lir, aser ali temu tendangtsü asoshi yimya balala indang shia lir.

Iba kaket nung ali bendentsü asoshi yimya shidak amshitsü indang shia lir, kechiaser ali tendangba nung aibelenra

sentong ajunga nung timtem ajurutsü.

Director, Soil & Water Conservation, S.K. Hekshe-iba kaket sayaba sentong nung jembidang, aluyimtsü asoshi ali temu tendangba nung tajangzüük aliba indang shia liasü.

Takotet nisungtem, researchers aser tejangrar temi ali shisadanga tendangba ajanga tebilemstü balala nungi jenbur, ta pai ashi.

Tzüngsang-mopung aser ali

asadangba ajanga resources tajungba amshitet aser tzü-mopung melenba den apet yimya balala nung alu ayimer, ta pai ashi.

'Soil and Weather' kaket ya Soil & Water Conservation, Directorate office aser District Soil Conservation Office tem nung angutsü. Tejangrar temi iba kaket ya Department indang website snwc.nagaland.gov.in nung angutsü.

### Kohima nung Sanitation Workers nem tetushi agütsüba sentong agi



**Kohima, Rongjui/Sept. 29 (TYO):** Sanitation Workers (Safai Mitra) nem tetushi agütsüba sentong ka September 29, 2023 nü Directorate of Public Health Engineering Department, Kohima nung agia liasü.

Iba sentong ya "Garbage Free India" omen kübok national campaign, "Swachhta Hi Seva" bilemteta agia liasü.

Iba sentong nung bendanga agütsür mürekmeju mapa inyaker (Safai Mitra) nisung trok nem Er. N.Thsathrichem

Sangtam, Chief Engineer, Sanitation & WSSO, PHED ajanga seyari sen aser kulizüing kaket agüja liasü.

Iba sentong nung Thepfulie, State IEC Consultant, Sanitation & WSSO, PHED, Nagaland aden.

### Pranabananda Women's College nung Photo Exhibition sentong agi



Swami Chinmayanandajee Maharaj ajanga Pranabananda Women's College nung Photo Exhibition lapoktsüba noksa angur.

**Dimapur, Rongjui/Sept. 29 (TYO):** Ministry of Information & Broadcasting, Government of India kübok Central Bureau of Communication, Field Office, Kohima ajanga Pranabananda Women's College, Dimapur nung aliba Internal Quality Assurance Cell (IQAC) den lungjemer "Poshan Maah" - "Suposhit Bharat, Sakshar Bharat, Sashakt Bharat" nüngtem nung Photo Exhibition sentong ka ayongzüka liasü. Iba sentong ya Pranabananda Women's College, Dimapur nung September 29, 2023 nü agi.

Chinmayanandajee Maharaj-i Pranabananda Women's College indang otsü tongmelang agi lemsatapa liasü, koba 1991 küm Nagaland nung tetsür indang college mezüngbuba ama lapok.

Pai Poshan Maah nung temolung agütsüsü ashi, koba tan ita India tesem ajungalen tetsür aser lanu putu tashi aser temeden indang angatetdakja amunger.

Peter Vero, Consultant, Behavioral Change Communication & Capacity Building for the Rashtriya Poshan Abhiyaan Nagaland Chapter ajanga Rashtriya Poshan Abhiyaan indang rateta ashidang, nüburtem nem shilem agidaktsüsü aser ajungmesotsü mechi linük ajungalen September ita nung Poshan

Maah ya amunger, ta ashi.

Iba sentong ya temang asoshi chiyongtsü tajung achi-ajemtsü indang awareness agütsüsü nükjidong nung lir.

POSHAN Abhiyan atema Ministry of Women and Child Development ya nodal Ministry ka ama national, state, district aser yimdak yimtsüing nung Ministry aser department balala den lungjemer inyaker.

Poshan Abhiyaan yagi tetsütem, teinlonglong tetsürtem, mashisa aser nubentsür, kinunger, healthcare agütsür aser nüburtem nem achi-ajemtsü indang awareness agütsür.

Iba sentong indang nükjidong ya temang shidak ainba nung tetsükdaktsü ajuruba, anaemia, under-nutrition aser tanur asodang temang tuozük ajemba nungi jenbudaktsüsü lir.

Iba sentong nung shilem ka ama Nikos Hospital, Dimapur nungi Dr. Khusboo Agarwal, MD ajanga tetsürtem temang müreka alitsü indang onük nung ajemdaker jemba liasü.

Iba sentong nung Central Bureau of Communication, Kohima indang Head of Office (FEO) P. Sophie-i melepzüing o jemba liasü.

### 2nd Dorians Society-i Spell Bee Competition 2023 ayonger

**Dimapur, Rongjui/Sept. 29 (TYO):** Dorians Society Dimapur ajanga 2nd Dorians Society Spell Bee tetoktepba sentong October 28, 2023 nü ayongzüksü, ta sangdong ka ajanga ashi.

Iba tetoktepba mezüngbuba June 2022 nung takok ngua ayongzüka agitetba sülen taküma iba tetoktepba nung Dimapur, Chümoukedima, aser Niuland district tem nungi government aser private school tem nungi iba sentong nung shilem agitsü jaoker.

School shia nungi Class 7, 8 aser 9 nungi kaketshir ana-na yoktettsü aser parnok meina tesayur ka yoktsü ayongzüker, ta Dorians Society Dimapur sangdong ajanga ashi.

Shilem agirtem anepalutsü asoshi kaketshir shia registration fee 200 alitsü. Ajisüaka government school nung azüngertem dang iba fee ya memeshitsü. Shilem agitsü asoshi tenüing ya October 20, 2023 tashinung agütsüsüla, ta ashi.

Iba sentong ya Notun Basti süngkum jakdang Tajen Ao Road nung Vikiye Complex nung aliba Kingdom Culture Church nung alitsü, anungji shilem agitsüpurtem anepdang 9:00 ako nung iba tesem tonga arutsü ayongzüker, ta sangdong

ajanga ashi. Iba tetoktepba nung shilem agitsü jangra aliba school temi mobile number 9436079538, 8974037334 nung tongteprateptsü akok.

Iba tetoktepba nung tetendanger asem alitsü aser pronouncers/moderators ana alitsü, koba organizing committee ajanga shimtsü. Dictionary nungi ojang ka ashitsü asoshi minute ana agütsüsü aser iba mapang ojang tetetzü, part of speech, etymology aser iba ojang amshiba tatishtitsü asüngdangtsü maongka alitsü.

Iba tetoktepba nung temaba jejang tongteter nisung asem nem senpet den kulizüing kaket agütsüsü.

Kaketshirtem tajunglen nungi toktepa ano sapang tuluba nung tokteptsü asoshi maongka agütsüsü nükjidong nung iba sentong ya ayongzüker, ta sangdong ajanga ashi.

Nüburtem tsüngta temelenshi tajung adokdaktsüsü nükjidong nung Dorians Society ya 1997 nung tentet aser mezüngbo saisapong nung rangloker liasü, ajisüaka meilongi lenla balala nung sentong ayongzüker aser inyaker, aser item rongnung Spell Bee Competition ya ka lir.



Nagaland Chief Minister, Neiphiu Rio aser dangartem lia Nagaland Angh, La Ganesan-i September 29, 2023 nü Botsa PHC indang ki tasenba semzüksüdüng tangokba noksa nung angur.

### Bloom Bazaar lapokogo



**Dimapur, Rongjui/Sept. 29 (TYO):** Advisor to Chief Minister & Chairman IDAN, Abu Metha-i Bloom Bazaar lapoktsüba sentong September 29, 2023 nü The Heritage, Kohima nung agiogo.

Iba Bazaar nung non-governmental nungi 45 aser

governmental organisation 15, talisa Agri aser Allied sectors nungi shilem agir. Iba Bazaar ya Hokulbar aser Honibar shia lapoktsü, kong indigenous flora aser local products, kenten-münü balala angutsü aser iba yagi state nung entrepreneurs aser tourism jejang ajungkettsü.



September 29, 2023 nü Jammu nung 'World Health Day' anogomong nung doctor tem aser kaketshirtemi 'walkathon' nung shilem agiba noksa nung angur.

## Linük Tiri Women's Reservation Bill agizüka ozüng kümogo

**New Delhi, Rongjui/ September 29 (Agencies):**

Taoba hopta Parliament House anaprongla nung Women's reservation Bill agizükba sülen Hokolbarnü linük Tir, Droupadi Murmu-i iba bill agizüka sign asüba sülen ozüng kümogo.

'Nari Shakti Vandan Adhnyam' ta ajaba bill ajanga Lok Sabha aser state legislative assemblies nung tetsürtem nem menden shilem 33 wazüka yutsütsü. Parliament building tasenba nung agizükba bill mezüngbubaji iba bill ya asütsü.

September 20 nü Lok Sabha nung züngsem 454-i iba bill pusema vote agütsü aser iba bill anema vote agütsürbo MP ana dang liasü.

September 21 nü Rajya

Sabha nunga iba bill agizük. Congress densema Opposition-i iba bill kübok Other Backward Classes (OBCs) aser SC/ST nisungtem-a züngoktsüla, ta akhangba den külemi sangküm General election matongdangsa iba bill ya mapa küma inyaktsüla, ta akhanger.

2010 küm Centre nung Congress-i aniba UPA sorkar aliba mapang nung Rajya Sabha nung Women's Reservation Bill agizüka liasü saka Lok Sabha nung iba bill magizüki liasü.

Taoba hopta Parliament House anaprongla nung iba bill agizükba sülen Ato kilonser, Narendra Modi-i, Parliament nung Nari Shakti Vandan

Adhnyam bill agizükba ajanga linük nung tetsürtem nem tashi tulu agütsütsü, ta jembia liasü.

Modi-isa, "Linük nüburtemi tesüiba küm aika bilema aliba tangbo atangji atalokogo. Parliament House anaprongla nung vote aika ajanga 'Nari Shakti Vandan Act' agizükogo. Tanü linüki tetsütem, aianutem aser jalatemi ajangshiba tetsükdaktsü ajak agiener. Women's Reservation Bill atema tetsükdaktsü aika liasü, ajisüaka kodang nukjidongji temerük südir aser teladak südir tetsükdaktsü ajak kokteter. Parliament nung aikati iba bill pusema atema ni party ajak aser MP tem dang pelar," ta metetdakja liasü.

## India nung aliba Afghanistan Embassy shibangtsü sangdonger

**New Delhi, September 29 (Agencies):**

India nung aliba Afghan Embassy-i, parnoki India nung Embassy shibangtsü, ta sangdongogo.

Iba ya ajanga India aser Afghanistan na tsüngda tesendaktep kongshitsüa akok.

Taoba mapang Afghanistan nung Ashraf Ghani-i aniba sorkari Ambassador, Farid Mamundzay leniba nung Embassy ketdangsertem shima liasü. 2021 küm August ita nung Afghanistan nung Taliban sorkar amenokba sülen-a India nung maneni Afghan Embassy operation liasü.

Ambassador, Mamundzay mapang talangka India nung

maliba den külemi Taliban sorkari India nung aliba Afghan Embassy nung tongti menden atema Qadir Shah shima liasü ta osang ka proka liasü. Shah ya 2020 küm nungi Afghan Embassy nung trade councillor liasü.

Taküm April-May ita nunga Afghanistan Embassy nung mangatetep adoka liasü, iba sülen Taliban-i Ambassador Mamundzay melen tangar shim.

Osang angazükba agi, Afghan embassy-i parnoki agiba telemtetba osangji India Ministry of External Affairs (MEA) nem metetdaktsüogo, ajisüaka tang tashi nungbo official osang mali.

Taküm küm tetenzüklen

Taliban sorkari India nung aliba Afghan Embassy nung tongti menden atema Qadir Shah shima liasü ta osang ka proka liasü. Shah ya 2020 küm nungi Afghan Embassy nung trade councillor liasü.

India-i tang tashi Afghanistan nung Taliban teloki aniba sorkar magizükteter.

India-i Afghanistan nung telok ajak dendaktsüba sorkar amenoktsü atema ajungshir, iba denji külemi linük kar anema kiralongratsü atema Afghanistan li mamshidaktsütsüla aser kiralongratem mejenokdaktsütsüla, ta ashir.



### Technology Development Board

Department of Science & Technology Block-II, 2<sup>nd</sup> Floor, Technology Bhawan, New Mehrauli Road, New Delhi-110016 Website: www.tdb.gov.in

#### VACANCY NOTICE

Tsünglanglen agüja aliba jenjang nung küm asem contract nung inyaktsü Indian senso nungi application meshir:

Sr. No.	Name of Position	No. of Position
1.	Project Coordinator (on contract basis)	09

Vacancy tejanga den qualifications, experience, consolidated emoluments per month, age limit, eligibility criteria, application format aser danga terms and conditions tem DST aser TDB websites (www.dst.gov.in and www.tdb.gov.in) nung angutsü.

Application agizüktsü asoshi November 10, 2023 nikongdang 5:00 ako tashi alitsü.

Sangdong tasen/temelenshitsu/metongshitsu lira itemji TDB indang official website nung dang inoktsütsü, anungji candidates temi mapang shia TDB indang official website reprangtsü ajungshir.

CBC 36106/12/0017/2324

Under Secretary, TDB



September 29, 2023 nü Ranchi nung aliba CRPF camp ka nung Jharkhand Chief Minister, Hemant Soren-i CRPF COBRA Battalion (209) nung constable, (asür) Rajesh Kumar mangjak nung akhüm agütsüba noksa nung angur. Brihostibarnü Maoists telungpurtemi IED ka pokdaktsüba lendong nung Kumar asü.

## Canada-i kiralongratem jenokdaktsür: EAM Jaishankar



Dr S Jaishankar

**Washington D.C, September 29 (Agencies):** Canada nung Khalistani lenir, Hardeep Singh Nijjar tepsetba nung India-i shilem agia alitsüa akok, ta Canada Ato kilonser-i tai tongloktsüba sülen India o Canada na tsüngda tesendaktep raksar lia India-i maneni Canada

aitsüdar.

Hokolbarnü US nung sentong ka nung jembidang India External Affairs Minister, Dr S Jaishankar-i, Nijjar tepsetba atema India nem tai tongloktsübaji India nung foreign policy anema lir aser Canada ya kiralongratem jenokdaktsüba tesem ka kümogo, ta metetdaktsü.

Paisa, Canada Ato kilonser, Justin Trudeau-i India nem tai tongloktsür, ajisüaka pai India nem iba kuliji magütsüteter, ta ashi.

"Tanübo ozü ketdangsertemi Canada nung aliba Embassy mesüra consulate-ia moutettsüsa tensa ka nung lir. Yimjak nung parnok amokmerener. Ibayongji ni khenpiga atema Canada nung visa maparen anentsüsa aküm," ta Jaishankar-i ashi.

Dr S Jaishankar-isa, "Canada Ato kilonseri tamasa nija nung tai kar tongloktsü, iba sülen tangbo yimjak nung tai tongloktsür. Onoki pa dang nija aser yimjak naprongla nung, pai tai tongloktsübaji onok foreign policy den mapet ta shiogo. Pa mesüra par sorkari onok nem onük kar atema inyakdaktsünüra onoki ibaji reprangshitsu melunga dang lir," ta metetdaktsü.

Jaishankar-isa US National Security Advisor, Jake Sullivan aser US Secretary of State, Antony Blinken na den Canada atema jembiogo aser iba tensa asadangogo, ta metetdaktsü.



**बैंक ऑफ बड़ौदा**  
**Bank of Baroda**

**CIRCULAR ROAD BRANCH**  
Ground Floor, Faith Building, Near Kharmahal Traffic Point,  
Dimapur, Nagaland- 797112, Email: vjdima@bankofbaroda.co.in

**SALE NOTICE FOR SALE OF IMMOVABLE PROPERTIES**  
APPENDIX- IV-A [See proviso to Rule 6 (2) & 8 (6)]

Securitisation & Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rule 6 (2) & 8 (6) nung ajemdaker E-Auction ajanga kiojen ayoktsü notice.

Public aser talisa sen apur (tem) aser Guarantor (tem) dang, tsünglanglen shia aliba kiojen, koba Secured Creditor, **Bank of Baroda, Circular Road Branch, Dimapur, Nagaland** dang mortgaged/charged süa liasü, ibaji Authorised Officer of **Bank of Baroda, Circular Road Branch, Dimapur, Nagaland**, Secured Creditor-i agiadokogo aser tsünglanglen shia aliba senotsü alangzüktsü atema iba kiojenji "Kong koma ali", "Koma lidir yamaji" aser "Yangji aliba ajak" ayoktsü. Sen apur/tem / Guarantor/tem / Secured Asset/tem / sentsüh / Reserve Price / e-Auction anogo aser mapang, EMD aser Bid Increase asüba senji tsünglanglen shia lir:-

**Status of Possession:** Physical

**Property Inspection anogo aser mapang:** 10.10.2023 & 10:30 AM nungi 4:00 PM

**Sentsüh ajak agi:** 29.12.2021 anogo tashi nung Rs.1,11,10,006.32 (Rupees One Crore Eleven Lakhs Ten Thousand Six and Paise Thirty Two Only), iba dak alia sen tetemlok aser tanga charges adentsü.

Sl. No.	Name & address of Borrower/s / Gurantor	Detailed description of the immovable property with known encumbrances	Date & Time of E-Auction	Reserve Price, EMD amount, Bid Increase Amount.
1.	<b>MR. CHINNY MAGH (BORROWER)</b> House No.208, Industrial Village, Razhuphe, Dimapur, Nagaland State- 797112.	A land measuring 0B-1K-18L and building thereon situated at Padumpkhuri, Dimapur covered by Patta No.1202, Dag No.295/1671 standing in the name of Shri Chinny Magh, S/o Late Ashiwa Magh.	16.10.2023 1:00 pm to 3:00 pm	Rs. 52,70,000.00 Rs. 5,27,000.00 Rs. 50,000.00
2.	<b>MRS. NAOMI MAGH (CO-BORROWER)</b> House No.208, Industrial Village, Razhuphe, Dimapur, Nagaland State- 797112.			
3.	<b>MR. SENILO MAGH (GUARANTOR)</b> S/o Chinny Magh, H/No. 208, Industrial Village, Dimapur- 797112, Nagaland.	<b>Bounded by:-</b> <b>North:</b> Plot of Lanu Ao, <b>South:</b> Approach Road, <b>East:</b> Plot of N. Konyak, <b>West:</b> Plot of Bohovi Awomi.		

Telatetbatem aser osang tejanga agüja aliba link nung angutsü <https://www.bankofbaroda.in/e-auction.htm> and <https://ibapi.in>

Date: 30.09.2023  
Place: Dimapur

Authorised Officer  
Bank of Baroda, Circular Road Branch



## TIR YIMYIM YIMOBILEM (EDITORIAL)

DIMAPUR KÜPTOKNÜ, RONGJUI (SEPTEMBER) 30, 2023

### Police sülen Tesayurtem koda ?

**A**sen lima nung gari lenmang dang masü saka yimten, lokti aser arogo ketdangsüba inyakyim ajak kanga mejungi raksaa lir, anungji asenoki kanga melenshinüaka ajak khenyongibo memelenshitettsü, anungji ka khen, ka khen ta melenshi tenzüksüsa kari anitsüla aser iba sülen kar khen, kar khen ta anidaka melenshitsü merangtsüla. Iba ama temelenshi tajung asen lima nung ataloktsü atema shitakba agibo asen tama melenshitsüla, saka aji asenok aika atema tasak anungji tangar melenshiba sülen danga melenshitsüsa bilema lidi. Aji oda, Nagaland tajungba küma melenshitsü atema yashi asenok den iba yimobilem nung lemsatepba ama Nagaland police-tembo tenzükogo. Joko, Nagaland nung Nagaland police nung machimajemtsü chia ajemer aser mozümora shibelenertem mayutsü, anungji aiben arütsür tashi mangartem mapa nungi anentsüogo aser taküm melenshitsü mulungtetertem anepaludagi. Iba denji ano tang nungibo Nagaland police asütsü atema yimjak nung memettdaktsü aser metendang ser miima tezülen nungi shinga manioktsü aser meshimtsü. Iba kisung jagi asenoki asung Nagaland tajungba küma melenshia aoba angutsü imlar. Iba jagi asung nungibo Nagaland police mera akettsü aser Nagaland police mera aketba jagi Nagaland mera akettsü. Iba denji metenloka Nagaland melenshia ao manentsü atema kaketreju nung tesayurtem melenshi tenzük nung jungla ta bilemer. Nagaland nung government ita sen achir nisung lakh ka dak tali lir aser item rongnungji police o tesayurtem na teimba asütsü. Ibaji kodang bilemdangdir, tangar memelenshiyonga, Nagaland nung police aser tesayurtem na taküm yimya aser inyakyim melenshiba agi Nagaland tesadangkabo melenshir amai asütsü. Atangji, Nagaland nung tesayur tajung aika lir, item jagi kenüa sodi magii bendanga agüja sayur. Item jagi peii sayuba kaketshirtemji pei chir ama meima sayur. Aji oda, school kar nungbo government-i meyoctetba agi tesayurtem rongnung tenla sarutepa maths aser science tesayur ama shima yur sayudaktsüba tesayurtema lir. Ajisüaka, ano tesayurtem aikati pei melen tangar yoker, ano karbo mapai mao ita sen agir. Ano, item dang nungi tamajungbaji teayurtem aikati moko sali chia tanurtem dang lesson sayur. Ano, tamajung rongnung tamajungtibaji tesayurtem karbo yi aser mozü lartem kümer lir. Item jagibo yi majem aser mozü machibo tanurtem dang mesayutetter. Ashiko, school aser class takdang nung sayur tesayurtem dang masü saka School Education Secretariat, Directorate aser District Education office-tem nung inyakertem rongnunga shi azü aser achiajem nung mazüoktetba ketdangser aser lenirtema alitsüa akok. Lira, item jagi anir melenshitsüla. Ajisüaka, Nagaland school education department nung inyakertem taküm yimya aser tangatetba melenshitsübaji office nungi sangdong ka agütsüba kijaibo memelenshidaktsütettsü. Shitakba temelenshi tajung ka arudaktsüdi süra inyakyim tama melenshitsüla aser iba inyakyimji tazung nungi tenzüksüla. Aji oda, School Education Director aser District Officer-tem ket nung parnok kübok kechi school nungsa kaketshir kwi aser tesayur kwi lir, itemji tama tejangja tenungteta metetmatsüla. Iba sülenji dang tesayurtem rongnung moko sali achir kwi ? Yi ajemer kwi ? Aser mozümora achir kwi ? Ano, achiajemba dang masü saka tesayurtem rongnunga karibo machimajemtsü ayoker asü mayoker (?) ta tashi bushisüngdanga putettsü merangba inyakyim ka tenzüksüla. Atangji, tesayurtem asüyonga nisung, anungji peisasa pei taküm yimya mazüoktetbaji nisunger yimya, anungji temulungertem asoshibo pei taküm melenshitsü asoshi mapang peria agütsütsüla aser teyari nungdaker aser aginertem asoshibo 'rehabilitation' sentong alitsüla. Iba amajika kar khen, kar khen ta melenshi metenzükra, Nagaland nungbo kar khen, kar khen ta tamajungbaleniang taintem sülen lanurtem anidaktsü. Atangji, tesasatsüka, Nagaland tajungba küma melenshitsü atema tesayurtem ajungshitsüba mapang ka nung, government-i parnok nem ita sen magütsütetba tensa tia ya tama melenshitsüsa akümer, anungji iba temelenshiijibo khenyongi menua melii Chief minister aser School Education advisor na nungi tenzüksüla.

## OLEMSABANG

### MISSION TO THE NAGAS ASER OKADAK AROGO OTSÜ TEMETEN BUSHIBA: OSEMLOK

~ Mar Longkümer

(Yashi adok nung...)

Rev. Dr. Clark-i anir 1876 Molungyimsen akümdangji Pastorbai Naga tenem nung arogo otsü ajakji yim tasen jagi bener ai nungji 1986 ABAM Special Committee-i bushitetba osang Central Council-i agizükbaji tim ta angateter. Anungji milenji Molungkimong nung tsüklokaka, iba tesangwaji Molungyimsen ajanga-ang Aolima dangi prokshi, aser küm ishika lir Impuri iba tesangwa bener atu aser iba jagi Nagalima ajak sangwadaktsü.

Rishikangshi aser Medangdangi ta asüba ocet nungji tebushiloktsü ishika shisemba züngogo. Tanüasung kaket züluba tasa balala amshia Rev. Dr. Clark aser missionarytemi zülubaji prime source/ primary source ta tapu balala ishika zülua angudang, obola nunger tongmelang tamang agi Yisu yimsuji agizükashila, tanüasung kaket zülutsü tasa tasen den medemdangtsü makoktsü ta bilemer. Rev. Dr. Clark masodang America nunger libaliru koma liasü itemji bushia missionary-temi zülua yutsübaji medemdangtsü ta asübaji tamakoktsü. Prime source dak Naga arogoji tenzük masü, tamanger par 9 + 15 dakji arogoji tenzük. Kechiaser America lima nunga Rev. Dr. Clark mapang nung kaket züluba tasatem nungji prime a ta primary a ta sourceji maliasüa shibai metet.

Kaket zülurtem asoshi itemji nungdaktsü südi saka Naga tenem nung Yisu yimsü tenzükbaji zülubanglu kecha maliba mapang nung parnok 24 dakjitenzük. Rev. Dr. Clark tebuttsü Mary Mead-i Molungyimsen nung school tenzük A,B,C ta aser 1,2, 3 ta mesayu tashibo Ao kin otsüji tebang o dak alaka zülubanglu kecha maliasü nung kechi source indang zülua jembitsü ali ta bilemetsür ati.

September 20, 2023 kasa onük nungji 1872 dak ajemdaker Molungyimsen nunger Jubilee amungtsü temeden lir mali ta asüngdangbaji tim asüngdangogo ta angateter. Kechiaser Rev. Dr. Clarki yim tasenba jagi Naga tenem nung arogo otsü ajakji bener aiba jagi Molungyimsen arogoa 1872 nungji ajemdaker amungtsü temeden lir ta angateter.

Tangari jembia angashiba agi 2022 ABAMi Yimjung Committee ka shima Molung anaprongla den ajurutepa yimjung mapa inyaktsü tenzük, saka parnok 15 nungji nisung 9 bo ABAM Sanen Luden züngsem liasü ta angazük. Outside nungi nisung 6 ji nungsen kanga agiogo südi, kechiaser parnokibo yimjung atema bilema jembi, saka parnok 9 jagi magizükttet südi. Itemji angashidang ABAM ya kechi aküm ta onok Mungdang nung metenzükkeribo aroka bilemer. Parnok 15 yimjung committee shimbajia miimshia dang shim, tangar dang parnok shimba teshi ta shiti nungji liasüa tasa jembia angashi. Aji shitak süra kechiba ABAMi miimshia nisungtemji shim aser ABAM Sanen Ludeni lemtetba dang agitsü asünungbo yimjung ludenji meshimtsüba ato !

Molungyimseni Court nung case agütsüba agi ABAM Sanen Ludeni "Settlement Committee" shim, saka parnok teinyaktsü kecha zülua mali ta angashi. Anungji mekümdangraiba Settlement Committee o ABAM Sanen Luden tsüngda-ang mangatettep madoklima ta bilemetsür. Ano iba Committee nungji ozüng meteter par 4 dena lir, anungji mekümdangra par 4 jagi ABAM Temzüng ozüng tasen ka latetja ibai agitsü ta shira ajia ABAM asoshi mepaitoktetba tebilemetsü asütsü.

Ano arogo ana tenung amshiba atema tai tokang ta mepishir. 1909 küm Khensa nung Yisu yimsü ya agizük, aser idakjia alimapur o Khristan tsüngda mepetmesü adokba agi joko Mokokchung nung British sorkar arua aliba mapang Khristantemji yim tasen ka akümstü mela. Ibaji 1916 (amai bilemer, kümji aibelena zülua lira metongshijangma) nung Meküli yim aküm. Saka Khensa aser Meküli arogo anaprongla 1909 nung yimsü agizükba nungji arogo anaprongla Jubilee amung. Süra Molung ana, Khensa aser Meküli tsüngda nungji kechi tepila ali?

Naga tenem nung arogo tenzükba osang missionary-temi Home Board dangi osang yokba nungji missionary-ba aliba arogoji mezüngbuba, aser tanabuba arogoji Merangkong ta asenoki nguogo. Ano tangatettsü kaji Molung ana nung atalokba ya Home Board aser British sorkari memelaba mapang atalok ta otsü nungjagi angateter. Tawa tanü ABAM Executive Secretary ajanga sarasademtsü ayongzüka Tir Yimyim nung adokba zünger kanga temoatsü ngua asen temenen Tsüngrem dang nangzüktsü ya mapang tajung ta bilema sarasademdako. Saka tsükchir danga Tsüngrem Ojibo ashitsüla nung kechiba ABAM Executive Secretary-i Molungyimsen arogo Jubilee nung Tsüngrem o jembitsü mao?

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# Arogo teintet rogotem asoshi medical camp ayonga katsü



September 29, 2023 nü Süngratsü Baptist Arogo Mission Board ajanga teintet rogotem (Senior Citizens) asoshi angati Medical Camp katsüdang tangokba noksa nung angur.

**Mokokchung, September 29 (TYO):** September 29, 2023 nü Süngratsü Baptist Arogo Mission Board ajanga ayonga teintet rogotem (Senior Citizens) asoshi temang angati tendanga anepaluba sentong (free Medical Camp) ka katsüogo, ta Süngratsü Baptist Arogo nung pastor, I. Kilen Longchar-i sangdong ka nung metetdaksü. Tanü, talisa yimtsüngtem nung teintet rogotem aika dak

Blood Pressure aser Shini tashidak lir ang süngla tetendangia mouteti rokonger aika lir. Item tebilemtsü reprangteta Teintet Rogo Deobar (October 1, 2023) nüngtem nung iba sentong ya kaogo, ta sangdong nung shia lir. Ajak agi teintet rogo 55 arua angati temang anepalua tapet mozü agüja liasü. Iba Camp nung Impur Christian Hospital nungi Doctor

asur Nurse tem arua teintet rogotem temang anepaluba liasü. Süngratsü Arogo ajanga Impur Christian Hospital dang amalitepa yaritepba asoshi pelaba den Tsüngremer temoatsü meshitsür. Tsüngremi maneni yimtsüng nung longzük tajung asütsü asoshi tsürabur tajungtem arishi maneni moajang ta tamang sarasadem ayur, ta kasa sangdong ajanga lemsatop.

# Good Friday Agreement agiba sülen küm 25 ajungba mong among



1998 küm April ita nung taoba mapang UK Ato kilonser, Tony Blair aser Ireland Ato kilonser, Taoiseach Bertie Ahern nati Good Friday Agreement nung sign asüdang tangokba noksa nung angur.

**September 29, 2023:** Good Friday Agreement agiba sülen küm 25 ajungba nüngtem nung Ireland nung aliba Catholic aser Protestant Arogo nungi lenirtem Rome-i oa sarasadem sentong ka agiba den külemi seminar ka nung aden. 1998 küm Belfast nung yimjung tezüngzüktep agia liasü. Ireland nung Arogo lenirtemi külem sangdong ka ajanga, iba tezüngzüktep agiba ajanga tesüiba küm 25 tsüngda taküm aika kümzükogo, ta metetdaksü. Iba anogomong sentong nung adenertem rongnung Ireland nung Catholic Arogo nung tongti putir, Eamon Martin aser Presbyterian Arogo nung tongti putir, Rev. Dr Sam Mawhinney na densema liasü.

Rome nung ayongzükba sentong nung adenertem rongnungsa Church of Ireland nung tongti putir John McDowell, Ireland nung Methodist Arogo Tir Rev. David Turtle aser Irish Council of Churches nung Bishop Andrew Forster nung liasü. Rome nung Holy See atema British aser Irish ambassadors, UK aser Ireland na nungi Vatican City State representatives-i seminar ji ayongzükba liasü. Arogo lenirtemisa sangdong ka ajanga, "Agreement agibaji Northern Ireland nung teti atema yimjung asoshi masü, ta asenoki mamadoktsüla," ta ashi. "Asenoki maneni akhümtsübutepetsüla aser

tangatetba balala süaka aremzükteptsüla, tangatetep alitsüla aser taitokteptsüla," ta parnoki ayongzük. Taoba mapang UK Ato kilonser, Tony Blair aser Ireland Ato kilonser, Taoiseach Bertie Ahern nati Good Friday Agreement nung sign süa liasü. Iba Agreement ya 1998 küm April ita nung sign asüba ajanga Northern Ireland nung küm 30 tashi rara-a aruba anena liasü. Chriss Trott aser Frances Collins nati külem sangdong ka ajanga, "Arogo lenirtemi Rome semdangba ajanga tanga Arogotem aser yimsü lenirtem ajungmesoa alima tesem balala nung yimjung aser taitokteptsüla atema inyaksü onoki imlar," ta metetdaksü.

# ANO GO ABEN TSÜNGREM DEN

## TSÜNGREMI LANGZÜR

Iba indang Kibubai temulung meyip: aji oda masütsü ta Kibubai ashi. Amos 7:3

Israel nungertemi ochimashi inyaka memeshiba lenmang nung jaja nungji, Tsüngremi parnok dangi temerenshi ayawara yoktsü indang ashi. Tesü adokba tsünütsü meia alidang süngku adokdaksütsü ta Amos ainkar dang sayu. Amos-i Tsüngrem dang tai tokang ta mepishi. Idangji Tsüngremi pa sarasadem langzüa ayawaraji matalokdaksütsü ta ashi. Tanaben ano Tsüngremi mi agi obendangtsü indang Amos dang sayu.

Pai ano Tsüngrem dang sarasadema iba miji agientsü mepishi. Amos sarasadem Tsüngremi langzü.

Tanü asenok mesamai aliba ya Amos ama asenok rongnung ainkar kari sarasademba agi ya tashi asenok mejungaka Tsüngrem taochi manung kümzükba anir arur asütsü akok. Nai asen lima asoshi sarasademba amajok masü. Asenok Arogo aser lokti balala lumia sarasademba Tsüngremi langzür. Anungji, ano tali sarasadem nung asen lima asoshi ajaki Tsüngrem dang ashitsüla. Asen sarasadem Tsüngremi langzüa asenok kümzüktsü, asen lima yanglushitsütsü, iba tamang sarasadem nung akanga lidi.

### SARASADEM:

Oh Kibuba! Na tesümgangisü taochi agi sunga aliba Tsüngrem. Onok dang tai tokang, Nai maneni onok kümzükangma. Amen.

# UK nung Khristantemi arem shiruru aser ozü kümzüktsü ayongzük

**September 29, 2023:** shilem tesadang shi Tang UK nung shiruru samadar. Talisa alu aser tapu trok shia nungi atsü nung aliba ozü kabo samatsüsa lir; shilem 60 jungnüa arem shiruru shilem 25 samadar," ta shi aser ozü-sangno metetdaksü. shilem tesadang shia "Aremlen kentenba samatsüsa lir, ta report ozü tapu aika tangbo tasen ka ajanga mali," ta pai ashi. metetdaksü. "Tsüngremi yangluba 1970 küm nungi ajak kümzüktsü aser tenzüka UK nung anepalutsüji asenok shiruru tapu balala teinyaktsü mapa lir. shilem 19 shi samaogo Anungji mezüngbuba aser ozü tapu 43 nung asenoki itemji m e s h i m e s h i a anepalutsüla. Tanabuba samatsüsa lir; iba dak nung parnoki alu nung alia naro shilem 64 shi aonsotsü raksatsüba samaogo. mesen achir aser tanga shirurutem atema-a UK nung arem shiruru tsütsü chiyungtsü lir. Anungji monginten aser sorkar chiyungtsü inzü (food agencies den külemi chain) ji raksatsüra inyakba charity shiruru tapu aika teloktemi senteper item samaba dang masü saka report renema liasü. aluyimba nunga Osangbener den kongshitsü, anungji jembidang Khristan Tsüngremi yangluba charity telok- A Rocha lima aser taküm shiruru UK nung tongti, Andy ajak anepalua wazüka Lester-i, "Onoki ayutsüji asenok temelenshi ana teinyaktsü mepa lir," ta jangjaogo. UK nung ozü pai metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Sangbang

(adj) süngsang aser kongsang agi zübang (overshadow by branches)

\* Arem min nung süngsang agi sangbangba agi ali nungi anü mangur.

Sangchisangnu

(n) tebu mejangjaba chir ( illegitimate child without paternal identity)

\* Yimten asr lokti nung sangchisangnu mamshir.

OLONG PAITEP # 6652

Grid for OLONG PAITEP # 6652 with numbers 1-17 in various cells.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S \_ \_ \_ i - (3)
9. Nisung telemasa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6651 TELANGZÜBA

TIPIEN :

- 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.

NAI-A YA METETTER MA

INDIA NUNG LOK SABHA GENERAL ELECTIONS :

Table with 4 columns: Election year, Lok, Single largest party, Leader. Rows from 1951-52 to 2019.

- Source : Internet

Assam nung DFO ka den foresters 2 ochimashi atema apu



VACD ketdangsürtemi Dhubri Forest Division DFO Binod Kumar Payeng apudang agiba noksa angur.

Guwahati, September 29, 2023 (Agencies): Vigilance and Anti-Corruption Directorate (VACD) ketdangsürtemi Brihostibarnü Dhubri district nung divisional forest officer (DFO) ka puogo.

Dhubri Forest Division DFO Binod Kumar Payeng-i sand mahaldar ka dang Rs 50,000 süpokrem meshi. Dhubri Forest Division telongtet nung iba nisung indang lisem abenba

garitem timtem kecha melii senzüsenbongtsü atema pai süpokrem meshi.

DFO-isa iba nisung dang pa kübok inyakba ketdangsürtem den ajuruteper itashia süpokrem sen agütsütsü jembiteptsü tetuyuba agütsü. Iba nisung jagi ashiba ama Dhubri Forest Division nung ketdangsürtem den ajuruteper aser parnoki pa dang Rs 4 lakh meshi.

Iba sülen DFO den

asüngdangteper parnoki süpokrem senji Rs 2 lakh agi ajem.

Sand mahaldar-i süpokrem agütsütsü memulungba agi VACD dang osang sangoktsü.

"Iba osang nung ajemdaker Vigilance and Anti-Corruption Directorate ketdangsürtemi Dhubri divisional forest officer office nung tasa ka atong. Brihostibarnepp 11:35 ako meta Ziaul Islam-i Rs 15,000 aser Sahabaz Sultan (Bittu)-i Rs 5,000 süpokrem meshia agidang apu. Tenaprong ya forester grade-1 lir aser tenati DFO den sentong atonger süpokrem meshi" ta police-i metetdaksü.

Tena ket nungi süpokrem agiba sen ajunga nguogo, ta parnokisa ashi.

VACD ketdangsürtemisa DFO Binod Kumar Payeng apu aser par asem anema kuli tejangja ngutetogo. Iba dak sendakba nung ACB Police Station nung FIR ka benokogo.

Meghalaya-Assam arrtsü atema DC-level senden amen

Shillong, September 29, 2023 (Agencies): Meghalaya kübok West Jaintia Hills district aser Assam kübok West Karbi Anglong district arrtsülen aliba Lapangap yimtsüng nung tensa süngjemdaksütsü atema senden ka menogo.

Brihostibarnü Meghalaya aser Assam deputy commissioner (DC)-level nung senden ka amen,

Arrtsülen aliba Pnar aser Karbi nunger tsüngda mepetmesü adokba angatetteptsü atema iba senden amen.

Meghalaya tenüng nung West Jaintia Hills DC BS Sohliya aser SPC Syrti na aser Assam tenüng nung West

Karbi Anglong DC Krishna Baruah aser SP I Barua nati anir senden amen.

Senden nung Karbi nungertemi Loom Moopyrdet aser Loom Pdeinphniar nung süngdong tema aliba atsüdoxksü takhangba agütsü. Iba ya meinyak tashi Lapangap aser Nongjrong nung Pnar nunger nem tsük merohdaksütsütsü ta parnokisa ashi.

Külen Assam police-i Pnar nunger dang Lapangap aser Nongjrong nung alu arohdang security agütsütsü nangzük.

September 26 aser 27 anogotem Pnar aser Karbi nunger tsüngda arrtsü atema mepetmesü adoka raratep.

Iba mapang Karbi nungeri

lasang amshi aser külen Pnar nungeri lijak amshia rara. Iba lendong atalokba osang angashir Assam aser Meghalaya police-i tensa aziüoktsü atema tesem tonga ao.

Assam arrtsü anasa aliba Meghalaya kübok Lapangap yimtsüng nung tensa mesüngjemteti lir.

CM Conrad Sangma-i Assam CM Sarma den iba onük atema jembitepogo ta Meghalaya minister Paul Lyngdoh-i ashi.

"Tesüiba nunga tilateri mangatetteptem adokogo. Asenok tsüngda arrtsü bentetba sülen iba ya anentsü" ta Paul Lyngdoh-isa metetdaksü.

Ukhrul journalist temi Assam Rifles mokdangba agiener

Ukhrul, September 29, 2023 (Agencies): Ukhrul District Working Journalists' Association (UDWJA)-i 24 Assam Rifles mokdangba agientsü telemtetba agiogo.

Telok ana tsüngda tangatettep kati aruba sülen UDWJA-i iba lemtet agi.

"Onoki journalists aser public atema mapang talangka endoka jembio. September 25 nü Ramva Check Post nung 24 Assam Rifles COB-i journalist ka aibelena merenshiba tatok agütsütsü lemtetogo" ta UDWJA-i ashi.

UDWJA president Addie

Chiphang-i anir züngsemtem aser 24 Assam Rifles, Shangshak Battalion Commandant Col Deeptodeep Mehta-i anir ketdangsürtem senden ka amendang iba telemtetba ya agi.

Iba sentong nungsa 35 AR, Somsai Battalion Commandant Col Manoj Shinde, Major Josephine aser Tangkhul Mayar Ngala Long (TMNL) lennirtem aden.

Col Mehta-i UDWJA züngsemtem dang officer Subedar Kamla Pati Joshi lenisüba kübok atalokba atema sasaa bilemba metetdaksü.

"September 25 nü check post nung ozü jawan temi tim mesüi inyakogo saka tarutsü nungbo ibala mesükba mataloktsü" ta paisa ashi.

"Iba mapa tajung atema UDWJA-i 24 AR, Shangshak Battalion mokdangba agientsü lemtet" ta Addie Chiphang-i sangdong ka nung ashi.

UDWJA-isa Manipur Hill Journalists Union (MHJU), All Manipur Working Journalists Union (AMWJU), Editors Guild Manipur (EGM) Tangkhul Naga Long (TNL) aser Tangkhul Mayar Ngala Long nunger dang pelaba metetdaksü.

Titabor nung arem shiditemi forest ketdangsür ka tepset

Jorhat, September 29, 2023 (Agencies): Assam kübok Jorhat district nung arem shiditemi amakdang forest department ketdangsür ka tepset aser asem kanga mejungi yirutsüogo.

Tasüsangji Atul Kalita ta jangjaogo aser pa ya Mariani Forest Range nung ketdangsür ka liasü. Brihostibar aonung

Bijoy Nagar, Titabor nung forest ketdangsürtemi arem shidi telok ka meindoktsü merandang iba lendong atalok.

Forest personnel ket nung rangpong aser osettsüset peria maliba ajanga iba lendong atalok ta osang angazüker.

Iba lendong nungsa Rajiv Burhagohain, Paragiyoti Dutta

aser Giren Mahatto nunger yiru. Parnok Mariani Forest Department office-i anir aru aser iba sülen mozü kidangi yokogo.

Tia maka lendong nung yirurtem mozü kidangi anir aotsü atema forest department ket nung gari maliasü. Iba jagi journalist kati pa indang gari nung parnok anir ao.

## Pakistan bomb lendong ana nung nisung 55 asü, aika yiru



REUTERS

Pakistan nung Balochistan province kübok Mustang district nung Hokulbarnü Eid Miladun Nabi benjong nung adentsü sentepba mapang bomb ya apok.

**Islamabad, Rongjui/Sept. 29**

(Agencies): Hokulbarnü Pakistan indang Balochistan province nung mosque ka anasa takum bendanga agütsür bomb pokdaksüba nung nisung 52 asü aser aika yiru, ta yangji aliba osangtem ajanga ashir. Mezüngbo iba lendong nung nisung 34 asü ta sangdonga liasü. Tang tashi iba lendong agütsüba telok katia tenüing agia mali.

Iba lendong ya linük southwest tsütsü Balochistan province kübok Mustang district nung Prophet Mohammed asoba anogo bilemteta tamangertem adenshia lia atalok, ta iba district indang assistant commissioner-i ashi.

Mustang nung memorial hospital ka indang chief executive Dr Saeed Mirwani-i ashiba agi, par mozüki nung nisung ter dak tema yariogo aser ano yirur alir nisung 20 dak tema Quetta-i yokogo. "Nisung tasü mang aser yirur alirtem belenshiba maparen tanga teinyakdak lir," ta iba mozüki indang CEO-i ashi.

Mozüki ana nung 'double entries' aliba mechi iba lendong nung yirur alirtem tenüing timba agüja liasü. Yirur alirtem ya nisung 50 lir, ta pai jangjashitsü.

Iba lendong ya "terrorist elements" temi agütsü, ta Pakistan indang interior ministry ajanga ashi. "Eid Milad-ul-Nabi benjong nung shilem agütsü arur

tai maket nisungtem dak lendong agütsüba ya kangasa mapa tamajung lir," ta ministry ajanga sangdong ka nung ashi.

Balochistan indang Minister for Information, Jan Achakzai-ia X (taoba mapang Twitter ta ajaba) social media sapang nung asürtem timba akumer ta shia liasü.

"Tsükchirtemi bendanger temoatsü nung Balochistan nung tamangba yimsü temeden aser yimjung samatsüner. Iba lendong ya temolung agi magizükteter," ta Achakzai-i ashi.

Tasü mait mapa inyaka lendong agütsüba asoshi temolung shiranger, ta Pakistan indang taoba ato kilonser Shehbaz Sharif-ia ashi.

"Iba mapa inyaker nem tekeraba nung obendang agütsütsü imlar," ta pai ashi.

PTI tekolakba Imran Khan-ia iba lendong aitsü aser yirur alirtem tajungtiba nung anepalutsü takhangba ola agüja liasü.

Ita tetenzüklen kasa district nung bomb tesashi ka poka nisung 11 yirua liasü.

Mustang district nung iba lendong ataloker mapang tatsüka tsüngta Khyber Pakhtunkhwa province nunga mosque ka poksatsü aser iba lendong nung nisung asem asü aser 12 yiru.

Iba lendong ya Hangu district nung Hokulbarnü sarasademba

mapang atalok, ta yangji alirtem ajanga ashi. Iba bomb poker mosque indang kilem chirepa nisung 30-40 tsüngta nembang, ta police ketdangsur kati ashi.

Takum bendanga agütsür bomb pokloksür anati iba lendong ya agütsü, kati police station indang gate nung pokloksü aser kati mosque telung nung pa-sasa pokset, ta ashi.

Khyber Pakhtunkhwa province indang caretaker Chief Minister Azim Khan-i ketdangsurtem dang mozüki ajak nung emergency sangdongtsü tuyu aser ozüing amshirtem dang iba lendong indang osang meshia liasü.

Taküm Pakistan nung iba ama lendong ya August ita timba liasü, koba 2014 küm nungi tenzüka ita shia lendong ataloka aruba rongnung timtiba lir. Tawa telungpur temai tali jateta adokba ajanga taruba küm January ita general election agütsü lia security forces nem anisüngzüik magütsür.

Pakistan nung 2023 küm tenzüker mezüing ita ti tsüngta takum bendanga agütsür lendong agütsüba 22 liasü, aser yangji nisung 227 asü aser 497 yirua liasü. Balochistan ya linük nung nütsüing tajemtiba aliba province ka lir, kong telungpur telok aika lir aser parnoki nüchiso asoshi rarar.

### ATM CARD ANA SHIA ARUA LIR

Mokokchung town Imlong place anasa SBI ATM Booth nungi ATM card ana shia arua Tir Yimyim Office Mokokchung nung tokja lir. Kiburi office mapang nung arua agizüktsü metetdaksür.

## US National Security Agency ajanga AI security centre sayaogo

**Washington, Rongjui/Sept. 29**

(Agencies): US defence aser intelligence services nung AI tashi renlokba aser lungjemdaksüba achayangtsü atema United States National Security Agency (NSA) ajanga artificial intelligence security centre ka lapokba sangdongogo. NSA aser US Cyber Command indang director, General Paul Nakasone-i Brehostibarnü ashiba agi, national security nung AI tali tongtipang akumba US ketdangsurtemi meteta lir aser centre tasen lapokba ya security, defence aser intelligence sector tem nung AI technology tarutsü jenjang yanglutsü meratem rongnung shilem ka lir.

"Tanü United States nung AI nung asenok tajangzüik lir. Iba AI tajangzüik nung asenok züpazüyima malitsüla," ta Nakasone-i Washington, DC nung aliba National Press Club nung ashi, kong pai centre lapokba aser China nungi timtem tali agütsüba indang jembia liasü.

AI centre ya NSA indang tang aliba Cybersecurity Collaboration Center den lungjemtsü aser linük indang security enterprise aser defence industry nung AI tashi tasen amshitsü asoshi rangloksü.

"Asen linük aser asen tembar indang tesendaktep, technology aser rongsenketzüing nung national security atema AI ya tali tongtipang akumtsü," ta pai ashi.

AI (artificial intelligence) yangluba nung US lenir lir aser bendangeri US indang AI miima agizüktsü merangba nungi nokdangtsüla, ta NSA tekolakbai ashi.

"AI tim masüba lenmang

nung amshiba, bendanger itdangiter temi item AI system nung timtem agütsüba aser AI security agütsü mechi timtem ajurubatem koktettsü asoshi asenoki AI nung timtem aliba angatettsüla," ta pai ashi.

Lendong timtem asadangtsü asoshi US-i AI amshiba indang asüngdang dang, US intelligence aser defence agency temi AI amshi tenzüikogo saka telemteba tatembangbo nisungisa agir, ta Nakasone-i ashi.

"AI ajanga asenok yarir, saka asen telemteba nisungi agir. Aser ibaji kanga tongtipang lir. Artificial intelligence nungi teyari agiba asenoki angur. Saka tatem nungbo nisungisa telemteba agir," ta pai ashi.

Osangbener temi asüngdangba langzüdang, 2024 US tir election nung Russia mesüra China-i teka sangshitsü merangba US security agency ajanga tang tashibo meputet, ta Nakasone-i ashi.

US tir election magidang danga linük aika nung elections agütsü aser iba ama tim masüba mapa inyaksü merangba nungi jenbutsü asoshi US-i tembar linüktem den lungjemer inyaksü, ta pai ashi.

China-i US aser par tembar linüktem dak rangloker mitkar osangtsüsang abenba nung timtem agütsütsüsa malware yanglur tawa cyber operations tenzüikshio go ta cybersecurity researchers temi shir.

Brehostibarnü US aser Japan ajanga sangdong ka agütsüba nung China nunger hackers temi mitkartem yariba sorkar, industrial, telecommunications aser danga tentet tem dak tenük yoker ta tekumdangtsü shia liasü.

## Niger southwest tsütsü telungpuri sepai tenet tepset

**Kandadji, Rongjui/Sept. 29**

(Agencies): Niger southwest tsütsü telungpur südi ta temolung melemi alirtemi amakdang sepai tenet asü aser iba lendong nung telangzüba agütsütsü merandang gari lendong ajurua ano sepai pongu asü.

Ita ana tejakdang mitkar tashi amshia sorkar atsüngdokba lenirtemi taoba mapang iba linük nung yimsü süa alir France dang linük nung telungpur den raratsü yoka aliba sepaitem anir aotsü mepishiba ama France-i par sepaitem anir aotsü renemba mapang Brehostibarnü iba lendong ya atalok.

Niger defence minister Salifou Mody-i sangdong ka nung ashiba agi, Brehostibarnü

Kandadji jila nung kiralongrar noklang ishikati military unit ka amak aser iba mapang sepai tenet tepset.

Iba lendong agütsüba nung langzüba sepaitem aodang gari lendong tuluka ajurua tasü tait sepai pongu asü, ta pai ashi.

Ano nisung tenet yiru aser parnok mozüki kati anir ogo, ta ashi.

"Tsükchirtem tsüngsü aputsü mechi operation ka tenzüikogo," ta minister-i ashi.

Iba lendong atalokba tesem aliba Tillaberi region ya "three borders" zone ta ajakdak lir, kong Niger, Burkina Faso aser Mali ajuruteper. Iba tesem ya telungpurtem, talisa al-Qaeda aser Islamic State group den sendaktepa alirtem atsükokdak tesem ka lir.

Linük southwest tsütsü Nigeria den arütsü lir aser yangjia Boko Haram aser parnok dak nungi jakzüikba Islamic State in West Africa Province (ISWAP) telok temi kasa timtem agütsür.

Niger nung election ajanga shimba sorkar July ita tatemlen atsüngdokba mitkar lenirtemi linük nung security tensa tamajungba akumer ta shiogo.

Mitkar lenirtemi yimten tashi rakzüikba sülen Niger nung telungpur temi lendong agütsüdang asür tali kumogo, ta Armed Conflict Location & Event Data Project (ACLED) ajanga ashir.

"Niger nung mitkar lenir temi yimsü asü tenzüker mezüing ita azüdokshi ya iba jakdang den medemdangra

shilem 42 agi timba lir," ta ACLED report nung shia lir.

August ita tiyonglen Burkina Faso den arütsü anasa telungpur temi amakdang sepai 17 asü aser 20 yirua liasü.

Mitkar temi sorkar atsüngdokba sülen linük nung iba lendong ya tesashitiba liasü.

Sorkar atsüngdokba mitkar temi akhangba ama France-i par sepai 1,500 Niger nungi anizüker aotsü renemba mapang lir, shirnok telungpur den raratsü asoshi Sahel region-i yoka liasü.

France Tir Emmanuel Macron-i par sepaitem anir aruba maparen taküm küm tatemlen tashinung tembangtsü ta shiogo aser sorkar atsüngdokba sülen aliba ketdangsur temi kiralongrar

anema raratsü tejangraba mali ta aitsü.

Mitkar temi democracy yimya nung shima alisang tir Mohamed Bazoum atsüngdokba ya iba region nung tasembuba alitsü, kong Mali aser Burkina Faso nunga kasa inyaka liasü, aser linük anaprong ya mapang ka France colony liasü.

Taoba mapang sorkar atsüngdokba mitkar temi France sepaitem anizüker odaktsü aser linük asemprong nung telungpur temi küm aika timtem agüja arur.

Niger nung United States sepai 1,100 lir aser parnokia France-i par sepaitem anizüker aotsü sangdongba sülen tarutsü mera agütsü atema asadangtsü ta shia lir.

## Asian Games Day 6: India nungeri gold ana densema medal ti angu



Women shooters Palak Gulia-i gold aser Isha Singh silver agizükba sülen tangokba noksa angur.

### Hangzhou, Rongjui/Sept. 29

(Agencies): Asian Games tenzüker anogo trok buba, September 29, 2023 nü India nunger asoshi anogo tajung liasü. Hangzhou, China nung iba asayamung nung India-i Hokulbarnü gold medal ana, silver pezü aser bronze ana ngua India nunger taküm iba asayamung nung medal anguba ajak agi 33 jungogo aser table nung jenjang pezü buba nung lir.

India nunger Aishwary Pratap Singh Tomar, Swapnil Kusale aser Akhil Sheoran nungeri teburtem 50m rifle 3 positions team event nung gold medal angu aser world record tasen yanglu aser Esha Singh, Palak aser Divya Thadigol Subbaraju nungeri silven ngua liasü.

Shooting nung shilem agirtemi tang tashinung medal 18 nguteta lir, koba Asian Games mapang medal timtiba angur alitsü.

India tsür squash team-i bronze medal ka angu aser tebur telok Honibarnü Pakistan den final asayatsü.

Anaben World Champion Nikhat Zareen-i semifinals asoshi jenjang ajangzükogo, anungji medal ka angutsü aser la Paris Olympics quota nguogo.

### Men's 50m Rifle 3

#### Positions (Team):

India nunger Aishwary Pratap Singh Tomar, Swapnil Kusale aser Akhil Sheoran nungeri teburtem 50m rifle 3P

event nung iba asayamung ayonger China madak takok ngua Gold medal ajanget.

Par aseme meyoakteper points 1769 nguteta world record tasen yanglua liasü. Taoba mapang iba world record ya United States-i points 1761 nguteta yanglua liasü.

Tomar aser Kusale na kija final tongogo saka Sheoran-i metongtet.

### Women's 10m Air Pistol (Team):

India shooter temi tanen makai medal ajangeter aser India tsür Esha Singh, Palak aser Divya Thadigol Subbaraju nungeri tetsürtem 10m air pistol team event nung silver medal ngua liasü.

India nunger points 1731 nguteta points pongu agi China dang tajemba liasü, shirnoki Games Record tasen points 1736 yangluteta gold angu.

Esha (579 points) aser Palak (points 577) na pongububa aser tenetbuba nung tembanga kija finals atema qualify süogo, saka Divya (points 575) terbuba nung tembanga kija final metongtet.

### Tennis Men's Doubles Final:

India nunger tennis tarep asayar Ramkumar Ramanathan aser Saketh Myneni nati tajungtiba nung asayaka Chinese Taipei nunger mokokteti Men's Doubles nung silver nung tembang.

Tena ya Chinese Taipei

nungeri 6-4, 6-4 agi akok.

### Women's 10m Air Pistol Final:

India tsür Palak aser Esha Singh nati kanga junga asayateja jika finals nung Gold aser Silver nguteta liasü.

Arishi küm 17 tain Palak-i points 242.1 ngutet aser arishi küm 18 tain Esha-i points 239.7 nguteta liasü.

### Squash (Women's):

Tanvi Khanna, Anahat Singh aser Joshana Chinappa nungeri tasü ita asayaka Hong Kong-i 3-0 agi tsükdaksü, ajisiüka par aseme India asoshi bronze ngua liasü.

India nunger teburtem iba asaya nung defending champions Malaysia madak 2-0 agi takok ngua Pakistan den gold medal asoshi asayatsü. Pool A group games nungi Pakistan-i India madak takok ngua lir.

### Men's 50m Rifle 3

#### Positions Final:

Aishwary Pratap Singh Tomar-i tebur kija 50m Rifles 3P final nung kanga junga asayateja points 459.7 nguteta silver angu. Pai China nunger Du points 0.9 agi memenepe liasü.

### Athletics: Shot Put:

Kiran Baliyan-i tetsürtem Shot Put nung 17.36m tashi merepteta bronze medal ka angu.

### Badminton:

Badminton nung India nunger tetsür temi tamakok ajurua tsükogo saka tebur team nung Lakshya Sen, Manjunath aser Kidambi Srikanth nungeri Nepal madak 3-0 agi takok ngua semifinals tongogo.

### Hockey:

India tsür hockey team-i Pool A nung Malaysia madak 6-0 agi takok angu.

### MEDAL STANDING FOR INDIA:

Tang tashinung Asian Games nung India nungeri medal ajak agi 33 ngua lir aser yangji Golds 8, Silvers 12 aser Bronze 13 alitsü. Asian Games medal tally nung tang India ya jenjang pezü buba nung lir.

## IOC-i Paris Olympics nung shilem agirtem hijab agitsü melar

Rongjui/Sept. 29 (Agencies): Paris 2024 Olympic Games nung shilem agirtemi athletes' village nung hijab ta ajaba tekolak nung sü inoktsü melar ta International Olympic Committee-i sangdongogo, aser France indang sports minister-i lar linük nungi asyartem nem tenokdangba agütsür anogo ishika dang lir iba osang ya arur.

Hokulbarnü IOC ajanga athletes' village nung hijab tenokdangba agienjaka France nunger saisaponger tembo parnok sports federation indang ozüing sülen anidaksü aser asaya mapang hijab agitsü memelar.

France nunger athletes tem den tensa tajungba nung angatetteptsü mechi French Olympic Committee (CNOSF) den osangtsüsa agitepa arur, ta IOC odongtar kati ashi.

"Olympic Village atema IOC ozüing amshir. Hijab mesüra danga tamangba yimsü mesüra sobaliba indang sübosolemtsü agiba nung tenokdangba mali," ta IOC odongtari ashi.

Olympic Village ya Olympic Games nung adener saisaponger 10,000 dak tema atema ki ama akumer, kong parnoki chiyongba langpang aser südoksünemba tesem kasa amshir.

Olympics nung asaya balala tetoktepba ya international sports federations kijai ayongzükker aser ketdang asür.

Secularism tamendakba akumtsüboa Paris Games nung linük nungi athletes tem hijab asema nokdang, ta French Sports Minister Amelie Oudea-Castera-i Deobarnü sangdonga liasü.

Nübur tenzüker nung ajak den kasa alitsü mechi saisapong sentong nung tamangba yimsü maitsü sayuba sorkari memolunger, ta lai France 3 television dang shia liasü.

France nung secularism kanga metsünga-reta wazüka ayur aser yangji Muslim nunger nema tenokdangba kasa agütsür.

School tem nung abaya nokdang ta August ita France-i sangdonga liasü. Tetsürtemi abaya agir school-i aruba mechi parnok aika kidangi meyipa yoka liasü.

Taoba küm January ita French senator temi saisapong tetoktepba nung hijab nokdangtsü vote agüja liasü aser taküm July ita France nung temaba court kati football asaya mapang hijab nokdangba ozüing medentsü.

## Süpokrem ken o nung police temi Barcelona football referee headquarters meita ao

Madrid, Rongjui/Sept. 29 (Agencies): Spain indang football referee committee nung taoba ketdangsür tem meyong firm ka nung Barcelona football club ajanga senotsü agütsüba bushisüngdangba nung shilem ka ama police temi linük indang football referee committee indang headquarters meita ao.

2001 aser 2018 tsüngta referee telemtetbatem melenshitsü asoshi Spanish football indang refereeing committee nung taoba tatong tir Jose Maria Enriquez Negreira indang company nem club ajanga sen dollar million aika agütsü südi ta prosecutor temi temolung malemer.

Catalan club-i Negreira nem senotsü agütsü südi ta temolung meleme aliba bushisüngdangba nung shilem ka ama headquarters meita aotsü Brehostibarnü iba ken o bushisüngdangba Barcelona court ajanga totuyuba agüja liasü.

Guardia Civil police force temi Madrid tezülen Las Rozas nung Spai indang football federation headquarters alidak committee indang base meita ao saka iba operation nung nisungbo maputsü, ta odongtar kati ashi.

Ochimashi maparen inyakba

mechi March ita Spanish prosecutor temi Barcelona aser iba club nung taoba tir ana, Josep Maria Bartomeu aser Sandro Rosell aser ano Negreira aser par jabaso Javier Enrriquez Negreira nungertem anema ken o benoka liasü.

Iba club yagi saisapong nung ochimashi mapa inyaka ta tai tonglokja lir.

1994 nungi 2018 tashi federation indang refereeing committee nung züngsem alisang taoba referee Negreira nem Barcelona-i 2001 aser 2018 tsüngta sen million \$7.7 agütsü ta prosecutor temi ashir.

Negreira meyong Dasnil 95 company ajanga 2016 aser 2018 tsüngta tax agütsüba nung meshidakba Spain tax ketdangsür temi jangjatetba sülen iba bushisüngdang ya tenzüka liasü.

Dasnil 95 yagi item küm tsüngta Barcelona nungi sen agizük ta ashir.

Barcelona-i aibelen mapa kecha meinyak ta ashir aser parnoki technical report tem atema sen agütsü saka asaya nung parnok telemtetba melenshitsü meranga sen kodanga magütsü ta ashir.

## 23rd NSF Martyrs Memorial Trophy: Yhome FC aser End of Era nungeri akok



23rd NSF Martyrs Memorial Trophy nung asayaba noksa angur.

Kohima, Rongjui/Sept. 29 (TYO): Angami Students' Union ajanga Indira Gandhi Stadium, Kohima nung tang ayongzüka tesayadak aliba 23rd NSF Martyrs Memorial Trophy, Hokulbarnü asaya nung AYhome Football Club aser End of Era temi takok ngua quarter-finals tongogo.

Mezüng asaya nung AYhome FC ajanga Patkai Christian College madak goal 4-1 agi takok angu. Iba asaya nung AYhome FC nungi Yhoto (30)-i minute 8, 49 aser 57 nung goal ka-ka yoka liasü. Kasa telok nungi Jhonny (11)-ia goal ka agüja par telok goal pezü ajung.

Patkai Christian College nungi goal ka ya minute 72 buba nung Rukuwe (10)-i agüja liasü.

AYhome FC ya quarter-final nung New Market FC den asayatsü.

Iba saya nung Mhasikhotuo (16) nem Man of the Match sempet agütsü, koba taoba

Angami Students' Union lenir aser 23rd NSFMMT organising committee züngsem Vitsikolie Kehie-i amokja liasü.

Tanabuba asaya nung End of Era-i makoktsü ama lir Khuzama Youth Organisation madak goal 5-1 agi koka liasü.

Khuzama Youth Organisation nungi Vilhuvoto Sale (12) ajanga asaya tenzüker minute ana nung goal ka agüja liasü.

Ajisüka iba asaya nung Kivi Zhumomi (10) ajanga minute terbuba nung iba goal kepzüker den külemi ano minute 32, 56 aser 67 nunga goal ka-ka agüja liasü.

Nyithong (7)-ia minute 13 buba nung goal ka agütsü.

End of Era nungi Kivi Zhumomi nem Man of the Match sempet Mteisuding, VP NSF ajanga amokja liasü.

### Matches for Sep 30:

1. Liangmai FC vs Teima Khe Kidima @ 11:30 AM
2. Asiiifi Football Academy vs Medziphema Royal FC

## BILEMDANGANG

"Meranga inyekeri dang meranga inyakba jenjang angateter."